

Jaorverslag V.V. De Spurriemök seizoen 2022-2023

Ut jaor van:

- Prins Mark d'n Urste mit zien prinses Bo
- Jeugdprins Niek d'n Urste en Jeugdprinses Hanne de Urste
- Ut jaor dat we begosse ien de Mökkestal op de Miëldersewèg
- Ut jaor van de neje Liende
- Ut jaor van ut urste fiëst ien de huuskamer
- Ut jaor dat ut seizoen wer op 11-11 begos
- Ut jaor van SorryFred
- Ut jaor van de adjes knaksap
- Ut jaor van ut prinsenummer, mit videoclip
- Ut jaor van ut sigrette kwietrake
- Ut jaor van standje Amber (wat nie zo spannend is as dat ut klinkt)
- Ut jaor van de donuts (wat wel spannender is dan dat ut klinkt)
- Ut jaor van Dicke Titt'n
- Ut jaor van de kapotte prinsemedailles, kroontjes en d'n scepter
- Ut jaor van de duikbootjes
- Ut jaor van "Williiiiiiiiiii"
- En natuurluk ut jaor van wer un fantastisch vastelaovesseizoen

Ut bestuur bestoond uut:

- Vurzitter Robert Steeghs
- Vorst Jop Loonen
- Penningmèster Stijn Nelissen
- Sik Sander Peeters

En de bestuursleje . . . Marc van de Ven, Toffel Gommans en Daan Willems

De Raod van Elluf bestoond dit jaor uut:

Pascal Classens, Fred Peeters, Roel Steeghs, Mark Steeghs, Rob Kunkeler, Han van de Sande, Paul Geurts, Wilbert Steeghs, Joep Willems en Willem Lemmen

De dansmariekkes ware: Renske Zanders, Judith Steeghs, Linda Willemsen en Amber Brugmans

11-11: Hoewel ut seizoen vur iederiën begos op 11-11, hebbe we mit de Spurriemök dizze dag niks georganiseerd. D'n Terp was definitief geslote en de Liende stond nog ien de steigers, dus un lokasie was te moeiluk. Un aantal van os zulle, net zoëas normaal, wel op de schuup zien gewist, mar nou hoefde die 's aoves ut raodselejepak nie mer an te trekke.

[KLIK] 12-11: Vorsteraodsbal.

Tradisioneel zien wej op de urste zaoterdag nao 11-11 naor ut vorsteraodsbal gewist, dizze kier ien Blitterswik. De jubilerende veriëning haaj d'r 3 jaor aover meuge doen um iets te organisiere. Sommige voonde ut dan wel jammer dat d'r gen zitplatse ware, andere kosse daar nie mit zitte. Ut was verder prima verzurregd ien de loëds, en de iëne nao de andere vorst moog zien woordje doen. Vorst Jop was as 7^e an de beurt, en dit was zellufs live te vollege op facebook. Annemarie woj gèr laote zien dat ze ok an ut kiekke was, en het zich toegevoegd an de livestream,

wat de verbiending nie zo gek leuk vond. Ut verhaal sloeg goed an, en ut cadeau ok, nameluk un mand vol grei wat vet, veul en ongezond was, iets wat tiggeworrig allemaol nie mer mugt. Nao de sprèkers was ut tied vur un fiëst, wat allemaol goed verloëpe is, tenminste as ge den kel van 65 den mit ziene kop op de beton viel nie mittelt. Oh jao, en dat Han zien strikske was vergète het ok niemes gezien. Uiteraard zien d'r naoderhand eier gegète bej Prins Fabian en Prinses Lonneke.

Daags dernao, op 13-11, zien wej naor ut jubileumfiëst van de Ruuk gewist. Naodat de busschauffeur op de Deputé Petersstraat stiekem zonder dat iemes ut zaag un spiegel van unne auto af haaj gejage, kwame we an bej dezellefde loëds as de aovend dervur. Daor was nou un klène receptie, en aansluitend was d'r un band die ut fiëst op gang mos brenge. Umdat veul meense wat muuj ware van de aovend dervur was ut un vrej rustig fiëst. Wat wel opviel was dat de mèste meense genne koppien han, en vroege os af wat vur bier ut was. As ut ma genne 0,0 was, want dat durfde niemes mer te drinke nao d'n aovend daorvur.

Un wèk latter, op 19-11 was ut jubileum van de Schanseknuppels. De loëds was tot ien de puntjes verzörregd, en wat vurral opviel was dat de raad van de Schanseknuppels zelluf ontzettend hard mitdeuj um d'r un groët fiëst van te make. Uut ut feit dat wej um half 1 un Câsels raadslid hebbe gefillicitierd dat hej de urste was die veur ien de zaal kwaam staon, kunde opmake dat de vurrige zin akelig sarcastisch bedoeld was. De band Knallerman miek d'r wel un moj fiëst van, ondanks dat de geluidsman pas richting ut eind van de aovend ien de gate haaj waar al die knöpkes toch vur ware, bejvurbeeld vur de microfoon van de zangeres. Ozze prins Fabian mos nog knuppelhangen, en um zo snel meugeluk wer an ut bier te kunne het hej zichzelluf nie te lang vastgehald. Uuteindeluk ginge wej muuj en voldaan, mar vurral trots op os eige jubileum wer terug richting Oeldere

Joep woj blikbaar kieke hoe de afdiëling gevonde vurwerpe van 't Maasdal deruut zaag, mar gelukkig ging de bus die os naor huus brocht nog urges anders wat Oelderse meense ophale, en haaj hej zien muts toch snel wer terug. Hej mos wel as vindersloon unne bak bier an Tim Schoeber gève. Blikbaar het hej dat 's naachts nog probiere te regele, mar hoe dat krek is gegaon wiëte we nie. En hej ok nie mer.

Wer un wèk latter, op 26-11, was ut jubileum van de Knöllekes ien Luëne, praktisch bej Vorst Jop ien d'n achtertuin. Dees loëds zaag d'r ietskes bèter uut, en hier stoonde de Rosenthaler op de bühne. Ut fiëst was goed, en vur we ut wisse was ut alwer vurbej. Toen we naor huus ginge mende Vorst Jop dat hej iederiën vur zich uut de bus ien haaj zien gaon.

Helaas vur Willem stond den wer verdekt opgesteld en stond Willem uuteindeluk alliën ien Luëne. Gelukkig vur um kos hej nog mit Fred mitreje, en zoë hoefde hej toch nie daor te slaope.

Daags dernao, op zondag 27-11, hebbe we nog mit un klène delegasie gezien hoe ien ut Dartele Vaöle de vurzitter en vorst gewisseld wiere. De vorst stopte nao 11 jaor en de vurzitter nao iets van 80 jaor. Naodat we nog wat mik naorbinne hebbe geschove zien we nie te laat wer naor huus toe gegaon, uustruste van de drie wèke fiëst.

Nao de kerst, mar nog net vur ald op nej, op 31 december, was ut prins raoje. Meense moge wer raoje wie de neje prins wier. Unne jonge, unne alde, of toch nog unne kier Fabian? Mies Willemsen zèj dat as Tim Schoeber ut zeuj werre, dat hej wel bej hun kos blieve slaope.

De twedde zondag van ut neje jaor, op 8 jannewarie, was de prinseproclamasie. Dizze kier nie ien de Liende, mar ien de loëds bej de familie vd Sande. Ien twië wèke tied het de veriëninging dees loëds umgebouwd tot unne volwaardige Mökkestal.

De vurrige aovend is d'r un klène pre-party gewist ien de loëds, um alles te teste natuurluk. Ut was wer net ietskes te gezellig. Zó gezellig dat Rob nog naor Wanssum woj ien pláts van de andere kant op naor huus, dochte wej. Mar de uutleg van Rob was hiël hendig: Naor huus vanuut de Liende, linksaf. Vanuut den Terp, linksaf. Vanuut Han, nie linksaf.

Ut programma begos mit ut aftreje van Prins Fabian en Prinses Lonneke. Nao 3 jaor moge zej nou toch écht de mantels afdoen. Nao ut uutreike van de proclamasie en ut officiële aftreje, wiere ze op un moje manier opgenome bej de APK en de EPK, en bedankt vur de moje jaore.

Daornao was ut tied vur de neje prins. Ien ut Krèntje was al te lèze gewist dat d'r un geheim recept gevonde was um extra energie vur de vastelaovend te kriege. Dit wier nou onthuld, en ut resultaat was geworre: SpurriePower. Dit goedje wier urst goed getest dur Professor P. Naodat alle tests geslaagd ware en Professor P verdwene, kwame de 11 regels. Bej regel 11 viel achter ut doek, mar daar stond alliën ut confettikanon, die mit Han-power de confetti wies an de andere kant van de zaal schoot.

An de linkerkant ging un gordien opzie, en daar kwame ze angevloge: Prins Mark en Prinses Bo. Uuteindeluk stonde ze op ut podium, en deuj hej ziene urste speech.

Naodat d'r unne groëte polonaise was geloëpe mit prins Mark en Prinses Bo ien de nek, wat Bo aoveriges super leuk vond, was ut tied vur ut jeugd uutkomme. De mök mog nog iengezègend werre, en terwiel Prins Mark de regels oplaas, zègende de jeugd de mök ien. Toen ging alle jeugd naor achter en begosse de 11 regels, mar die stopte want de stroëm was op. Naodat wat kiender uut ut publiek han gefietst kosse de 11 regels toch beginne en stonde daornao, op de zolder baove ut podium, Jeugdprins Niek d'n Urste en Jeugdprinses Hanne de Urste. Nao de speeches ginge ok zej ien de nek ien unne groëte polonaise.

Efkes latter, toen de urste hèndjes geschud ware, was ut alwer tied vur ut volgende onderdiël van ut programma. We han drie jubilarisse, te wiëte Mark, Fred en Roel, die d'r 11 jaor bej ware. Van de Spurriemök kregte ze de orde van de bronze Spurriemök uitgereikt. Daornao deuj de vorsteraod ok nog un woordje, en vurzitter Rob Poels het os allemaol os excuses an laote bieje an Fred, umdat den ien zien urste jaore unne mantel van de jeugd um haaj gehad en veurop ien de polonaise mos mit unne chocomel. #Sorryfred was gebore. Daornao kregte zej alle drie de orde van de vorsteraod.

's Aoves was nog de priesuutreiking van ut prinsraoje, un paar uur fiëst, Mark en Bo hebbe hun eige liedje nog gezonge, en un delegatie is ok nog bej de aoverbure gewist, want daar was de tiedeluke soos. Naoderhand zien we uuteindeluk eier gaon ète bej prins Mark en Prinses Bo, waar ut tot ien de late uurkes dur is gegaon.

Op 14 jannewarie was ut Ald Wieverbal. En dit jaor kregte we toch zoëmar neje Roëj-Gèl-Gruune strikskes. Ut fiëst der fiëste wier dit jaor muzikaal opgeluusterd dur Sjoetingstied. Ut was un moj fiëst, de kaoje ware nog steeds fies, of lekker as ge gen smaak het, en de pilskes smieke goed. Ut prinsepaar het nog hun liedje ge....zonge, en de prins van Luëne ok. Wel hebbe we nog klachte gehad van de bure. De muziek stound nie hard zat, ze kosse ut nie zo goed huure. De prieswinnaars zien ok bekend geworre:

- Derde pláts: Dark Mark
- Twedde pláts: Deutsche Mark
- Urste pláts: Vèrkes ien de Mökkestal

En de troostpries ging naor Stef Claessens, un bekske kaoje. Érm jong.

En ienmiddels tradisiegetrouw zien we uiteindeluk nog eier wiste ète bej de Prins en Prinses.

Vrejdag 20 en zaoterdag 21 jannewarie ware de Bonte Aovende. Dit jaor ware op vrejdag de gedichtjes van de vorst wer terug van weggewist. Op zaoterdag was den d'r nie, dus mos d'r unne vervanger geregeld werre. Tot op de lèste dag is nog vur de mèste meense geheim gebleve wie dat zeuj gaon doen. Uiteindeluk was ut bekend: Marco de Mulder ging de bonte aovend prizzentiere! En hej het dizze aovend an iederiën laote zien dat hej ut zeker nog nie verlierd is. Hej was goed vurbereid, zeg ma van ut niveau dat ozze vorst nog wel wat van kan liere, en ut ging um kei goed af, zellufs ondanks dat hej zich eigeluk ga nie fit vuulde, want daar het denk ik bijna niemes wat van gemerkt. Al haaj ik wel Willem ziene kop wille zien toen den 's merges gebeld wier dat hej d'n Bonte Aovend mos prizzentiere umdat Marco ziek was, mar die eer is alliën an Tiemke gewist.

Mar natuurluk han we ok unne hoëp optrejes.

De urste groep liet zien hoe wej allemaol zun wille dat wej kosse danse. De vrollie van de S.E.S.-crew onder leiding van Janne Maes han alles goed geoeffend want ut zaag d'r prachtig uut.

As twedde was daar 't aovendje plat ien d'n Terp. Vrollie die zich han vermomd as Gerrit, Paula, Carlos, Prins Mark, SorryFred en Bas Willems name os plat op de vloer nog iëne kier mit naor d'n Terp. Kim, Lin, Britt, Nieke, Sanne en Yaniek, hartstikke moj gedaon.

As derde kwaam de jeugdroad op, as Backstreet Girls en Spice Boys, of andersum, en die dun unne waore dansbattle. Zowel bej de kels as bej de vrollie, waaronder Jeugdprins Niek en Jeugdprinses Hanne zit ien ieder geval zat danstalent.

Doarnao was ut wer tied vur un jaorluks terugkerende act, nameluk de drumband mit Drummen Mit Emmers. En dat was eik ok letterluk wat ze dun, en dat dun ze goed. Dirk, Aron, Bart, Edwin, Guus, Harm, Luc, Noud, Niek en Sander, onder leiding van Bart Jeuken sloege mit hun lepels d'r un moj ritme uut. En ze kunne nog zinge ok nog!

Op de vrejdag was ut toen tied um Math en Wilma nog es unne kier ien ut zönneke te zette. Ze hebbe 12 jaor lang vur os klaorgestaon, en daar kosse wej nie zoëmar an vurbej gaon. Ze kregge nog unne moje bos bloeme, un bierpakketje, en zat complimente um nog jaore vuruut te kunne.

As lèste vur de pauze was ut tied vur Mökkejacht. Willem as goooooooooooooo(...)ejenaovend Gaston en Toffel as lekker wief... ik bedoel koffergirl. Zej hebbe un paar prieze uutgedèld die ge achteraf eik nie waot hebbe, en Toffel het laote zien dat hej 's nacht stiekem altied op hakke löpt, want de mèste kels han hun knäök gebroke op die pornopaöl.

Nao de pauze wier de zaal Loss-gemaakt mit Loss. Zej dun hun hiële repertoire, en d'r wiere flink polonaises geloëpe. Iederiën was wer wèrm, tied vur de volgende act.

Dit was ok unne B-O'er, unne ienmiddels Bekende Oelderse. Pietje Potloëd, oftewel Frank Steeghs vertelde wat hej as anonieme reporter allemaol het mitgemakt, en we hebbe d'r biëstig um gelache.

Daornao was ut wer tied vur de APK. As un waor sprookje wier dur Emiel verteld wat de 7 of 8 dwerge allemaol han mitgemakt mit de volslanke Sneeuwvitje. Zeg ma Sneeuwvit, want zo klèn is Rob nou ok wer nie. Toen hej uiteindelik wakker gekust wier dur Prins Mark of Prinses Bo, kosse de dwerge Math, Martien, Hans, Pieter, Ron, Theo, Ton en Vincent hun geluk nie op. En tonièlmèster "goeiemorge" Gerrit die het netjes 't grei wer opgeruimd.

As afsluuter van de aovend was daor unne buut. To'ntje de klusjesman het os verteld waor hej allemaol geklust haaj, en dat deuj hej goed. Waor we allemaol van stonde te kieke is dat hej wel ontzettend veul Oelderse meense kende, en ok over ozze prins haaj hej unne hoëp verhale.

Zoë kwaam an ut Bonte Aovendprogramma un end. Uiteraard zien we nog tot ien de late uurtjes durgegaon, en zellufs Vorst Jop is nog op de afterparty gewist naodat de brulluft afgeloëpe was. Tenminste, naodat hej de kots van zien nèfke uut den auto gevègd haaj. Ok het de raad op de afterparty un nej shotje uitgevonde: Shotje knaksap. Ut bekt wel lekker, mar an de braakgeluide van Willem te huure smekt ut asof d'r un kat ien owwe moel lit te jonge.

Vrejdag 27 jannewarie zien we naor Circus Mök gewist. En jao gillie huurt ut goed, ut was ok dit jaor wer nie Rök. Wej ware sinds lange tied wer us op d'n urste dag mök iengepland, ok wel bekend as de premièreaovend, pettenaovend, of diknekke-aovend. Ut programma viel hiëlemol nie tege, en ut feestje daornao was ok bèst prima, ware ut nie dat wej tamelik vroeg naor huus mosse i.v.m. de bus. Gelukkig han we wel al de pèns strak durdat wej op de anvoerroute van de snacks stonde. Al mit al bèst unne geslaagde aovend. Oh jao, en vur degene die op Circus Snack nog nie zat han gehad ware d'r nog eier bej de prins, waor ienmiddels 5 van de 10 flesse van de vurrad Dark Mark op ware.

Zaoterdag 28 jannewarie was de prinsereceptie. Dit jaor wer mit de groëte en ut jeugdprinsepaar bejen, umdat ut anders nie ien ut programma kos. We begosse um 11 over 7 mit de sirrenade, en daornao was ut 2,5 uur lang af en an un rej meense die wilde fillicitiere of un stukske dun. Prins Mark, prinses Bo, jeugdprins Niek en jeugdprinses Hanne kregen bekant unne vrachtwage vol mit grei.

Tiejes dees receptie hebbe Mark en Lizzy ok un onderscheiding gekregen van de jeugdvorsteraad, umdat zej zich allebei al 11 jaor ienzette vur de jeugd van de Spurriemök.

Ok tiejes de receptie het Knolbeat ok nog hun hiële repertoire laote huure en d'r ware ok nog un paar andere veriëninge op bezuuk, en toen mosse de jaormedailles ok nog uutgedèld werre. Dit proces hebbe we us goed versneld, want d'r mos un fiëstje gebouwd werre. En naodaot Prins Mark unne hiële korte mar krachtige speech gehalde haaj, kwaam dat fiëst d'r ok.

Ut was un groët fiëst, en ut was nog lang gezellig. Ien principe zun we um un uur of 1 stoppe, en rond half 3 hebbe we mar es de muziek uitgezet. Daan en Marloes mosse urst nog hunne tillefoon zuuke, en nao hiël lang zuuke kwaam Daan deraachter dat hej um ien zien tès haaj, en Marloes op de speaker den eigeluk nève ur stond. Daornao het Marc van de Ven nog bekant de raad van Miëldere van ut terrein motte schuppe, en toen kos ok hej eindelijk an de eier, want toevallig was ut wer eier ète bej de prins.

Zondag 29 jannewarie was de Jeugdbontemiddag. De organisatie was dit jaor un samenwerking tusse Oeldere en Câtele. Oeldere haaj vurnameluk de stukskes geregeld, ut programma, de glazespuuler, dat Prins Mark d'r was, Prinses Bo, de vorst en un aantal jonge van de raad, en Câtele haaj mit zien drieje geregeld... dat de deur van slot af was... en dat d'r te wenig stuu!

ware. Kleine verbètèrpuntjes dus. Uuteindeluk was ut vur ut publiek unne hartstikke moje middag mit veul stukskes, geprizzentierd dur Lars en Joep. Toen ut daor af was geloëpe zien wej allemaol tuus wat gaon ète, of bej Daon op de shoarma gewaacht den un uur te laat was. Daornao zien we nog ekkes ien Aostrum gaon kieke, want die han daor jubileumweekend, en de rest van de daag kosse we nie. Toen wej daor binne kwame was ut wel goed te merke dat we op ut eind van un jubileumfiëst binne kwame. D'r ware d'r al un del naor huus, en wej liepe gemiddeld toch wel un paar promille aachter, mar de band Naachtwaerk was goed, en ut was toch nog wel vrej gezellig. Uuteindeluk hebbe ze os daor ok wer letterluk naor buute gevègd.

Maondag 30 jannewarie, is de kraom de la kraom van de Spurriemök ien Geijstere gewist. Daor was de artiestenaovend van ut LVK. Prins Mark, Prinses Bo, Vurzitter Robert en Vorst Jop kosse daor vest alle finaliste anhuure die dat weekend ien de finale van ut LVK stoonde. 15 veriëninginge x 4 man, plus organisatie, plus 20 artieste of groepe waarvan bejna allemaol mit un man of 5, en de organisatie docht: Laote we dat es ien ut klènste hok ien de gemènte Venroj doen. Mar goed, ut piés, en ut was best gezellig. Bietje muziek luustere, bietje aldehoere, bietje munte koëpe mit wel 15 cent korting. Uiteraard was os prinsepaar wer nie naor huus te houwe, ok al was ut unne kale maondag, en ozze vurzitter is zellufs nog mit eier wiste ète.

Vrejdag 3 fibbrewarie was ut LVK. Dit wier georganiseerd dur de ganse Vorsteraod mit 15 veriëninginge. Talloze vrejwilligers van zowel binne as buute de raad hebbe hier ure wèrk ien gestoke, en de loëds zaag d'r prachtig uut, vurral de tapijttegels op ut podium en de VIP-wèg. Ut was werkeluk afgelaai vol mit 7000 man ien de loëds van Hoex. Mit zien alle hebbe we daor gezien hoe Pruuf Mar mit hun nummer "Aojem blieve hale" de mèteste punte kreeg en winnaar van ut LVK wier. Un aantal jonge het ut nog vur mekaar gekrege um op ut VIP-dek te komme waar ge vur niks kost zoëpe, en die zurgde dat d'r ok wat grei perongeluk naor beneje viel. Ut fiëstje mit Naachtwèrk daornao was ok wer goed. Ut was bèst gezellig, en mit os gekrege mèters bier wier nog ekkes ut spelleke "Zuuk d'n Tepel" gedaon. Op un gegève moment wier d'r veuraan dur verschillende veriëninginge gedaon wat we altied duun, flink hosse, en dan göt motte oëit welles un stepke an de kant doen. Sommige lellike fieze diknekke mit unne piëlhazevlag op hunne rug mende Vorst Jop rond te commandiere dur te zegge dat hej "zien raad onder controle mos halde". Nao ekkes tot 10 geteld te hebbe het Jop d'r ekkes mit gepraot en de gemoedere wer bedaard, en was de keld uut de lucht. Uuteindeluk het ut ok genne zin um ruzie te make mit unne misseluke idioot den te voel is um zien vette lief an de kant te slejpe terwiel hej van zien nut wief die derbej stoond tuus niks te vertelle kriegt en dan daordur tigge andere unne groëte moel ment te kunne hebbe. Uuteindeluk zien we nog un eike wiste ète bej de prins.

Zaoterdag 4 fibbrewarie was de Big Party. Aangezien dit ganie ien pak was en verder ok nie echt carnavalsgerelatiërd hoeve we hier eigeluk nie veul over kwiet. Wat zeker wel noemeswaardig is, is dat Willie kwoj was op Stijn, omdat den gen kartje haaj besteld vur um. Toen het hej uuteindeluk bej de dagkassa mar un kartje gekocht, um d'n dag dernaor deraachter te komme dat hej zelluf online ok al un ticket haaj besteld.

Verder was ut unne gezellige aovend mit un keur an artieste, en uuteindeluk zien we toch nog mit veul man eier wiste ète bej de prins den nie ien functie was. Dizze aovend ware d'r ok unne hoëp Cêselse bej, en dit is ok den urste kier dat d'r metiën un fles bier kapot viel, dur unne Cêselse. Ok het Roab de prins gehollepe dur eier te pote ien d'n tuin, zoëdat d'r wer neje kosse groeie.

Woensdag 8 fibbrewarie was de JVV-Aovend. We begosse wer mit lekker ète: Soep en Boeremoes mit balle van Paula, en un toetje mit slagroom. Daornao was d'r unne buut van Toën van de Blaoskapel, dur Luc Janssen. Daornao zeuj eik Waldina un aantal nummers komme zinge, mar helaas was die ziek. Gelukkig het zej un zus die ok muzikaal was, Tineke, alliën haaj die nie zo hiël veul carnavalsnummers. Op urre trekbuul, of pènsplano, het ze de meense toch wel un tiedje vermakt, mar sommige miste toch wel de carnavalsmuziek. Gelukkig haaj ze nog wel ekkes Oeldere Mien Dörpke iengestudierd, en dat het ze ien iëne dag gedaon. Volgend jaor toch mar es kieke dat we un ietskes voller programma hebbe, en volges Wies Loone moog ut allemaol wel wat harder, dus misschien toch mar es de Stoere Patsers probiere te boeke vur de JVV-aovend. Nog wel noemeswaardig: D'n buutreedner vroeg op de app an zien contactpersoon Willem Lemmen of d'r toevallig ien Oeldere nog iemes was mit groëte flapoere.

Vrejdag 10 fibbrewarie zien we mit un aantal man naor ut ald wiewerbal ien Câtele gewist. We ware nie al te vroeg, kwame midde ien ut fiëst binne, en Joep was knip en den haaj dorst. Oh jao, en ze hebbe daor tiggeworrig Lindeboom. Alle ingrediënte vur daags dernao koppien. Ut was best gezellig en ietskes latter as gepland ginge we naor huus.

Zaoterdag 11 fibbrewarie was 's middags de krantverkoëp. De Krant-cie haaj wer moj zien bèst gedaon op un neje edisie van "Ut Spurriemökske", en dizze is ok wer hiël goed verkocht.

's Aoves was ut fiësjje van Prins Mark en prinses Bo: Ut Markitabal. Dit zeuj ut lèste fiësjje zien bej Han en Elma ien de loëds. Mark en Bo kregge unne bouwhelm op mit vère en un kroontje, de hiële raad haaj vur dees gelegenheid un veiligheidshesje an, dus ut fiëst kos beginne.

DJ Bartus Staigerpaip en DJ Team Sex on the Beach zurregde vur de muziek. D'r ware ok nog un paar andere carnavalsveriëninge, dus alle ingrediënte vur un moj fiëst, en dat wier ut ok. Opblaosgrei vloog dur de lucht, d'r wier radje gedrèjd, d'r wiere achtersteveure polonaises geloëpe, en Prins Mark het op zien trätot ok nog un liedje gespuld. Althans hej deuj zien bèst, an ziene tomateroëje kop te zien. Uuteindeluk ginge we, naodat un paar raodsleje mit opblaoshammers an ut kieke ware wat en wie d'r allemaol kapot kos, wer muuj mar voldaan naor huus. Behalleva as ge natuurluk bej de Prins en Prinses eier wart gaon ète.

's Zondags zien we mit zien alle de loëds op gaon ruume, en gelukkig was dat veul rapper gebeurde dan ut opbouwe. Toen we zo'n beetje klaor ware kwaam ut CDA of zoiets nog mit frikandelle um stemme te winn... kuch... de vastelaovend un wèrm hart toe te drage. Of dat dan verstandig is mit airfryerfrikandelle is vraag twië, mar we kosse ut gebaar wel wardiere.

Toen brook de wèk van de vastelaovend an. De wèk waor we normaal nog ekkes rustig kunne beginne en nie teveul planne. Oh nèe waacht...

Dinsdag 14 fibbrewarie woj os prinsepaar naor ut prinsetrefte ien Remunj. Ut was hiëlemaol geweldig, mit un groët fiëst, veul veriëninge, kei gezellig en moj, althans, volges de verhale. Ien werkelukheid was ut un ruilbeurs vur jaormedailles ien allerlei vurme, schietdruk, en ut geluid was gruweluk slecht. Gelukkig het os prinsepaar wel lol gehad, en Toffel en Willem ok, ien de shoarmatent. We hebbe wel kunne kieke hoe andere veriëninge derbej loëpe, en dan voonde wej toch allemaol dat os prinsepekske tameluk moj is, ien plats van un ontplofte muts of unne hoed mit unne spinnejèger van pouwèvère baovenop. Uuteindeluk muuj mar voldaan wer naor huus mit de bus mit un paar andere veriëninge, en d'r is nog eier gegète bej de prins en prinses.

Donderdag 16 fibbrewarie was de SJMO-carnaval ien de neje Liende. We hebbe hier es goed gekeke wat d'r allemaol veranderd was, en kosse d'r vast vurzichtig an wenne. We ware wel hiël ekkes bang dat alles nej was behallevé d'n thermostaat, mar gelukkig bleek dat nog ekkes finetune.

Vrejdag 17 fibbrewarie was de schólcarnaval. En vur ut prinsepaar en Vorst Jop begos dat al op de Keg ien Venroj um 10 uur. Ze wiere as un stel idole ontvange mit groët applaus, want de kiender vonde ut echt schitterend dat ze d'r ware. Nao unne speech, ut prinsenummer, un paar optrejes en ut uutwissele van medailles ginge we nao un uurke richting Câtele waar dit jaor de schólcarnaval wier gehalde. Den optocht was net vurbej, en we ginge metiën de zaal ien. Daor was ut urst voedertied mit onder andere brudjes bótter, en daornao ware d'r unne hoëp optrejes van kiender, en uiteindeluk, toen de schól eigeluk al uut was, kwaam Nevvenèn ok nog op bezuuk. Naoderhand nog ekkes naor de kroeg, en daornao naor huus, want 's aoves ginge we op ziekebezuuk. We zien bej Ronald de Lang gewist, den dit jaor genne vastelaovend kos viere, en Ronald en Tineke vonde ut kei moj dat we efkes an zien gewist.

Zaoterdag 18 fibbrewarie begos ut vur sommige mit ut groët vastelaovesontbijt, mit ansluutend ut opbouwe ien de Liende, en vur de Prins, Prinses en Vorst ut jaorlukse tripje naor ut jongste mökske. Dit jaor ware we op bezuuk bej Josette Pepping mit dochter Nora. Ut mökske is ien d'n tuin gezet en de medaille umgehange, en nao wat gekeuvel, wat lastig genoeg vur Prins Mark groëtendiëls ien ut ABN was, ginge we d'r wer vandur. 's Middags ginge we naor de installasie ien de schouwburg. Ut publiek mos wel staon, mar kregé uiteindeluk wel wat te drinke. De raad van Rooj gaaf wer us ut goeie vurbeeld dur tiejes ut officiële gediëlte mit unne bult pizza naor binne te komme kwake en uut de dèle binne hun veriëning. Blikbaar ware de nekke nog nie dik zat. Ut schilt wel dat as d'r pizza ien zit ze hunne mond unne kier ekkes kunne halde. Nao alle verhale van de Burgejuffrouw, Vorst Leon, de Prins van Rooj, Rob Poels, en Vorst Steef, en ut umhange van alle medailles en sleutels, was ut tied um de gekrege vlaai op te ète en op koste van de belastingbataler te gaon drinke. Gelukkig ware d'r ok wer shotjes, mar op iën of andere manier ware die zoë op. Dit diëls umdat d'r op iën of andere manier mar shotjes bleve verdwijne ien de tas van Judith. Hoeveul d'r krek ien ginge zal altied un raodsel blieve, wat we wel wiëte is dat we d'r nog 3 daag plezier van hebbe gehad.

Daornao ginge we natuurluk nie naor de Roetsj, mar wel naor de Keipoetsroetsj ien Geijstere. Ut was wel gezellig daor, mar ut haaj veul minder diesel gekost as de Keieschieters die daor ware naor Oeldere ware gekomme, want ut was un tameluk Oelders fiëstje. Toen we eindeluk de prinses ok zowiet han dat ze mit ging zien we vertrokke naor Oeldere want we han nog un druk programma.

's Aoves was nameluk ut Mökkebal ien de neje Liende. Daor zien we begost mit hiël ekkes stil te staon bej ut overlije van Maarten Peters. Daornao begos de band, en dit jaor han we Afslag 7. Zej mieke d'r un ontzettend groët fiëst van. De Jeugdraad het nog live mit de band hun nummer gezonge, en uiteraard het ut prinsepaar hun eige liedje "Fiëste mit de Spurriemök" ok wer ten gehuure gebrocht. Ien de pauze het Prins Mark nog un lientje durgeknipt um de vastelaovend te opene, en daornao de medaille ien de kast gehange. Zoëas wej dat ienmiddels van um gewend ware mit un kort ma krachtig woordje. Daornao ging ut fiëst gewoën dur, en zellufs ut eier bakke ging dur zonder vaste eierbakker Mark. Wel mit unne nuchtere Rob den de botterhams mit eier uut deuj dèle, mar nuchter was daor gen flikker an zej-ie. Ok is dizze aovend ut brandalarm getest,

en ut is prima dat dat gebeurt, ut mot nameluk wel werke. Alliën was ut bèter gewist as dit gebeurt dur unne specialist. En nie um 2 uur 's nachts.

Zondag 19 fibbrewarie begosse we mit d'n optocht. Dizze begos bej jeugdprins Niek waar hej ok gestald het gestaon. Trakter Jan deuj reje, mar wel op de dur de opa van Jeugdprins Niek gerestaurierde Farmall. Dit jaor ware we zonder joekskapel, en das toch raar polonaise loëpe mit half werkende muziek van de carnavalswage. Mar naodat we jeugdprinses Hanne en os prinsepaar op han gehald kos d'n optocht beginne. Helaas was dizze dit jaor nie zo gek lang. Hopeluk wert ut nie nog minder, want dan motte we ut straks genne optocht mer noeme mar gewoën ut showe van de prinsewage. Naoderhand was ien de Liende de priesuuttreiking, mar de winnaars Roel en Ron ware d'r nie, dus hebbe de elders van ut jeugdprinsepaar hunne pries gewonne. Daornao hebbe Niek en Hanne ut jeugdbal geopend en kos ut fiëst beginne, en ut was unne gezellig drukke middag. We kregge ok nog un optreje van Pim en Peet, want dat haaj Jolanda de Rijck gewonne. 's Aoves ging de zaal dicht en zien we mit un delegasie naor de soos gegaon. Daar het de jeugd nog ekkes gespeeched, en Prins Mark uiteraard ok, kort ma krachtig, zoëas we van um gewend zien. Hej haaj nog wel un moje uitspraak: Alles wat hierbaove gebeurt, dat kan gebeure, mar alles wat hier onder gebeurt, dat wette zeker! Denk daar mar es aover nao. Ansluutend zien wej nog naor de huuskamer gewist waar DJ Roel stond te drèje, en hoewel ut wel ekkes wenne was op de neje lokasie, was ut toch gezellig. Naoderhand is d'r vast wer eier gegète.

Maondag 20 fibbrewarie begos mit ut snotneuzebal. De vloer was vur de allerklènste Spurriemökskes, en an ut end kwame de ballonne naor beneje. Daornao begos de Brakke Maondag. Twië busse ginge naor den optocht ien Venroj, en ien den Oelderse bocht wier den groëte optocht gekeke, terwiel ut groëte en klène prinsepaar mit de jeugdraod en de vorst dur d'n optocht hin trok. Op den wage wier d'r keurig netjes an de regels gehalde. Nie zoepe en nie roëke. Wej wiëte dan ok oprecht nie hoe de magische tas van Judith an ut eind van den optocht ienèns zo licht kos zien, want we han netjes Sinas gedronke. Wat daar gebeurd is dat wiëte alliën un paar Chinese behierders van Tiktok.

Iënmaal terug ien de Liende stonde DJ Wiki en Willem te drèje. Ok kwaam Appie Heijn nog optreje. Daornao wiere de bakplate angeslinderd en was ut tied vur brudjes schaop en pannekuuk. Die lèste mosse wel ekkes bej Pouwl en Mel tuus gebakke werre, want niemes den dichterbej wónde han un werkend fornuus. Naodat we allemaal wer zat gegète han wier ut ien de zaal wer langzaam leger, en via de soos zien we wer naor de huuskamer gegaon, waar Robert en Willem lekker dur an ut drèje ware. Ok letterluk, want ze han un rad geregeld en daarop koste verschillende dinge winne. Tenminste, as ge mar iën helluft van un lötje hat, ien plats van twië. Dizze aovend hebbe we nog un moj optreje gehad van unne Freddy Mercury lookalike. Ok zien we der achter gekomme dat de Liende opnejt verbouwd mot werre, aangezien ondanks alle geluidsisolatie André Hazes nog steeds te huure is as ge buute stöt. Ondanks dit lèste was ut unne geslaagde dag. Oh jao, en naoderhand is d'r wer eier gegète.

Dinsdag 21 fibbrewarie de lèste dag van de vastelaovend. We begosse mit de brunch die we vort ien de Liende gaon halde, die han un antal vrollie van de raod klaorgemaakt. De soep, ut vleis en alles wat derbej huurde smieke èrg goed, en dit is zeker vur herhaling vatbaar.

Ansluutend begos de BBZ. Dit jaor mit unne iets andere opzet. We begosse zoëas andere jaore, dit jaor toevallig mit de Roojse Artiëste. Toen die klaor ware en Vorst Jop ze af woj kondige, wier hej onderbroke dur twië kels, Rob en Han, die de middag van commentaar kwame vurzien.

Toen zej vol enthousiasme de Roojse Artiëste han afgekondigd, kwame de prizzentatore Toffel en Willem vertelle wat de bedoeling was. D'r wiere meense uut ut publiek gehald, en die krege via d'n beamer un zuggenaamd nie vantevurre gepland nummer vurgeschótteld naodat ze op d'n knop han gehouwd, en dat moge ze dan gaon zinge. Naoderhand moge ze un presentje uut de kluus hale. De familie van de hoëghede, de buurt, de APK, kammeraöj, en noem mar op, allemaol hebbe ze op ut podium gestaon. Ut was bomvol ien de zaal en ut was ok hartstikke gezellig. Op un klein akkefietje mit d'n beamer nao, ging alles hartstikke prima. Prins Mark haaj zellufs zien eige nummer op de traöt geoeffend, en dat klont ontzettend. An ut eind van ut programma wier Ingrid nog onderscheide, en die besloot toch nog mar un paar jaor dur te gaon ien de organisatie.

Dezelfde DJ Ruud stoond wer ien de zaal, en ut was nog èrg gezellig. Rond 6 uur was de afsluuting van ut jeugdbal, waar Pascal names de jeugdcommissie de jeugdprins en -prinses hun eige proclamatie het gegève. Uuteindeluk ginge wer langzaamaan richting de Huuskamer. Rond de klok van 10 was ut tied vur de afsluuting ien de soos. Nog iëne kier speeche vur Jeugdprins Niek, Jeugdprinses Hanne, en Prins Mark het ok nog gespeeched, kort mar krachtig, zoëas we van um gewend zien. Mit wer un moje uutspraak: As ge iën goei helleft het, is ok zat. Daornao was ut tied um buute op de parkierplats de klène mök ien de fik te stèke en was de jeugdvastelaovend vurbej. Althans, vur degene die toen naor bed ginge, mar de meste van de jeugd ginge nog mit naor de huuskamer. Rond kwart vur twelluf begos vorst Jop mit de afsluuting. Urst was ut tied vur nog un paar medailles vur meense die ze nog nie gekrege han. Daornao moog Prins Mark d'n urste mit zien prinses Bo platsneme op de stuu ien plats van ut biljart, en was ut tied vur de prins ziene afscheidsspeech. Zoëas we van um gewend zien was dizze speech kort en krachtig, en ruum un hallef uur látter kosse we dan toch naor buute vur ut mök verbrande. Dit terwiel we nog mit zien alle compleet hygiënisch an un fles Prins Mark an ut lurke ware. Ut vastelaovesseizoen 2022-2023 was vurbej, en ut was ondanks alle uitdaginge die we zien tegeekomme toch un ontzettend geslaagd seizoen. Zoëas Mark zej zegge: Bedankt, daorvur.

Terug ien de huuskamer was ut helaas dur wat communicasieprobleme um 2 uur afgeloëpe, mar binne un hallef uur ginge we naor de huuskamer van Mark en Bo, waar ut tot ien de late uurkes is durgegaon. Zoë kwaam d'r uuteindeluk toch nog un redeluk tradisioneel einde an de vastelaovend.

Dit was ut jaorverslag van seizoen 2022-2023.